

1 NWER NYI PITA

¹ Me Pita ji li ntiingetib a Jisos Kraist, me wo kp'nyono nwer nyia tv ane ba Esowo ma yehke bo, ba ma yaame, song jol ajahmjahm go ajahbe nya bo kpo lung re Pontus, Galesa, Kapadosa, Esia, a Bitinia.*

² Wahn ba li ane ba Esowo Nsoo kahn-n wuku wuku, Etingi Etohko ji ma-n lim, m ma jol ejahne ejahne, eji n l'jo kak Jisos Kraist, fere bar tib go ege alung. Nong, nnoobo nyi Esowo, a elkoono ene jo kpe gbal na go egahne ellong.

Ana ekunukpu ji aneb Esowo li no

³ Nong, wahr tehken Esowo Nde no Jisos Kraist Ntul ewahre. Egburu ndon enye nyi wahnge á ma-r ka elkpin ni nfenfe, tib eji á nyahme Jisos Kraist go elkv. Ano wo wahnge e sahb kp'kpi ekunukpu re,

⁴ e bahke bele nsol elehke elkv nyi Esowo ma kuuru bum-r go ege ejahbetul, edi ji nsol nyio l'k'tiki bol, edi ji l'k'tiki ranng, edi ji l'k'tiki tan.

⁵ Nsol nyia nong ka wahn ji Esowo kp-n baabe go ege a nsahm, a eltaame enahne, eji n l'bel eltahre ni kp-n siki, ni Esowo bahke lennge es'kohro ngare.

⁶ Jo belen eyebatahng go nsol nyia, jol afi li ka-n re wahn nyehn erem anv mmongare ntiil,†

* 1:1 1:1 Jems 1:1 † 1:6 1:6 2 Kor 4:17

fere yel go elgaare ni li go nkohn a nkohn. Tibre elgaare ni bahke tibi,

⁷ joare ekakesehk ejahne li ji nno. Jol agul nya bahke ma ranngē, bo kpo w'wuungu go agun.

Ano wo fvfo ekakesehk ejahne ji nobo sehngē agul, bo bahke tob wuungu go agun, eji n l'bel ellub, bo fere tehk-n, fere kpun-n efung bio bi Esowo bahke lenngē Jisos Kraist tib,

⁸ ye ji kpo kor-n, jol eji n kal-e ny'nyehn, ye jio ji n kp'taame tv-e, jol eji n kil-e elnyehne anv.‡ Ye j'nehm wo wahngē n sahb kp'kpi eyebatahng ji nne l'k'ma bung go nnyo.

⁹ Tibre eltaame enahne ni n kp'taame tv-e, go es'kohro wo, atohko enyahne bahke gohro bel eltahre.

¹⁰ Eltahre nia ni li ejum ji abanyehnamahr Esowo jo sahb s'seb re bo kahn, bao ba jo nyehn amahr bada nnoobo nyi Esowo bahk-n kake.§

¹¹ Etohko ji Kraist ji woomo bo go atahng ji jo tong bo bade erem bi Kraist bahke nyehne, fere jo bung bade ellub ene ni bahke toono erem ebe. Bo jo noko re, bo seb kahn ngare nyi ejum jio bahke limi, fere kahn ana ngare nyio bahke jolo.

¹² Esowo lenngē ka abanyehnamahr bao re, etib bio jolem ka bo, li ka wahn. Etib bia bi li nnoobo etib bi abungalum Esowo tiing-n no. Nnoobo etib bia, Etingi Etohko ji tumu go ejahbetul Esowo tv. Jol babenjel bahke tob kor bo re, bo tob fahng, eji bo l'tob kahn nsol nyia.*

‡ 1:8 1:8 Jon 20:29; 2 Kor 5:7 § 1:10 1:10 Luk 10:24 * 1:12 1:12 Ef 3:10

Ana Pita jo rehke abon Esowo re bo bel elkpin ni nno

¹³ Jolen ane ba ma toobo ebjing go egahna ntir. Nong, amahr enyahne jol sange sange. Yehken ekunukpu ejahne kpee, wahn kunu go nnoobo nyi Esowo nyi bahke bake go egahne, ngare nyio nyi Esowo bahke lennge Jisos Kraist ka-n.

¹⁴ Jolen ana abon ba kpo kak babnde. Kana kpe bel elkpin ni wuku wuku n tohko bel ngare nyi n kala kahn Esowo, eji n jo lim ana jo kor-n.†

¹⁵ Nobo re wahn jol ejahne ejahne go ejum ajehng ajehng ji n kp'limi, ana Esowo bi lung-n no li eje eje.

¹⁶ Tibre nwer Esowo bungu re, “M bahke jolo ejahne ejahne, tibre mefono antahng li ejame ejame.”‡

¹⁷ N kpo lung Esowo re, Nsoo, n l'kak ero ka-e, ye ji kpo lam nne awohng awohng, jang jang ana ji a limi no. Ano wo fvfo nobo re wahn jo jen go ege elfahle, eji n kpeke li go njini nyia ana ajenne.

¹⁸ Tibre n kp'kahne ekun bi a ka no re a fak-n yake go elkohn eljini ni n leeme goji babnso ejahne,§ ni ki li ejumjum. Ekun bi bo ka no jolem nsol ana agul, a asilva nya bahke ranng na,

¹⁹ jolo anobonobo alung ma Kraist, ana alung mmon a njoro no nno a nno, no ki bel elem ajehng ajehng.*

²⁰ Ye wo Esowo yehk-e no wuku wuku, njini kehm jolo. Esowo ma fere lenng-e es'kohro ngare nyia, tib go egahne esi.

† **1:14 1:14** Rom 12:2 ‡ **1:16 1:16** Mat 5:48 § **1:18 1:18** 1 Kor

6:20; 7:23 * **1:19 1:19** Jon 1:29

21 Ye wo wahng ka m ma bum Esowo go etingitingi, ye ji nyahm-e go elkv, fere ka-e ellub, eji n l'taame tv Esowo, fere jo kunu ekpu eje.

22 Anv, ana m ma ru ntim enyahne saang, eji n kp'toono etingitingi, abonane ejahne fere jo sahb kor-n kor, jo belen etingitingi elgoro atemtem, a ntim a ntim enyahne kpee.†

23 Wahn ebkpe tuungu jini. N tuungem jini tib go nsol nyi bahke bolo na. N tuungu jini go nsol nyi l'k'tiki bol, nyi li alum Esowo nya li go njinanjini.‡

24 Ana nwer Esowo bungu re,
“Ane kpee li ana ajele.

Ano nya bo li ana afem ajele.

Ajele l'kpo, afem nyao kum.

25 Alum nya Jehova li go njinanjini.”

Alum nyao nya li nnoobo etib bi bo ma-n tiingi.

2

Atal nya bo ko si etahk Esowo

1 Yaken eblum alimi, enehm, awini, eteelala, a afahnge akiimi lake ane!*

2 Jolen ana abonbili ba abel kpo kor bo ngare anyehng anyehng, bo jo yab.† N l'yab abel nyao nya etohko, owo m bahke gbale, fere bel eltahre.

3 Tibre wahn ebwuungu nnoobo nyi Esowo, ana nwer Esowo bungu no.

† 1:22 1:22 1 Jon 3:14 ‡ 1:23 1:23 Jon 1:13; Jems 1:18 * 2:1 2:1 Ef 4:22 † 2:2 2:2 Hib 5:12-14; Mat 18:3

⁴ Jeeren ba goji Ntul a Jisos, ye ji li eltal ni li go elkpín, ni ane ma ten, ni kp'sahb n'nob go esamahr Esowo, ni Esowo ma yehke.

⁵ Tob jolen ana atal nya li go elkpín! Nong, bo ko-n si etahk Esowo ji etohko,[‡] edi ji rín bahke jo lok-e ana abarebare abalimajom ba kpo lim ajom nya etohko, nya Esowo kpo ko, tib go esi ji Jisos Kraist. §

⁶ Tibre nwer Esowo bungu re,
 “Me n yehke eltal ni nno a nno, ko kp'bumu nnahb ekahme go Sayon.
 Nne awohng awohng no l'taame tv-e, bo we nehm tiki riki ndon.”

⁷ Eltal nyi kp'nobo ka wahn ji kp'taame. Goji ane ba kil eltaame, eltal nia li ana,
 “Eltal ni abasehketahk tene no.
 Eltal nia ni ma fere jol nnahb ekahme.”*

⁸ Edi nwer Esowo jehko kpe bung re,
 “Eltal nia ana ni, ane bahke jo seele.
 Ekpartal jia ji bahke jo lim ane gbo.”
 Bo kp'seele, tibre bo nehme bum alum Esowo, owo Esowo toobo no re bo seele ano.†

⁹ Wahn ba li akahmekahme ane ba Esowo ma jak, wahn ba li abalimajom ba Jehova, ba li ebo ebo, ba li ka Esowo ntahngtahng.[‡] Esowo ma-n yehke re wahn tib nnoobo eljini ene. Esowo b'nehm bi lung-n no, yehke go ejanngé, fere ko-n, ba a nahne go ege a nkpokosi ellenngé.

¹⁰ Ngare nyehko rín jolo ane baka baka. Any, wahn ebfere jol ane babe. Ngare nyehko rín

‡ 2:5 2:5 Ef 2:21-22 § 2:5 2:5 Rom 12:1 * 2:7 2:7 Mat 21:42

† 2:8 2:8 Rom 9:33 ‡ 2:9 2:9 Ell 1:6

kahnem ndon nyi Esowo. Anv, wahn ebfile Esowo ndon, yebtahm ka-n. §

Jolen alokeltum ba Esowo

¹¹ Akpondahme enyame, n kp-n rehke, eji n li ajenne, a ajahmjahm go njini nyia, kana jo gbod, toono ejum ajehng ajehng ji kpo mell-n go egahne ntim. Tibre ngubjing, a etohko, bo li go ebta.*

¹² Jo limen eljini ni nno go ellong ane ba ki nyi Esowo. Bo l'jo bung ab'bi bada nahne re wahn abi ane ba, bo bahke nyehne nnoobo enyahne, fere tehk Esowo efung bi á l'ba.†

¹³ Jo bumen atahm nya atubesi ba njini nyia, tib go esi ji Ntul a Jisos, afi jolo atahm nya ntul no nnen no ga gbal kpee,

¹⁴ afi jolo atahm nya atubesi ba á ma tum bo re, bo jo kak abi ane erem, fere jo tehk ane ba kpo lim nob nob.‡

¹⁵ Jo limen agboolo ane ba kil elkahne ejumjum, bo jo belle tib go egahna nnoobo nyi n kpo lim. Tibre ana wo kpo kor Esowo.

¹⁶ Jolen ane ba ma for! Kana jo ko elforo enahne ni m ma for, jo bulu eb'bi ajehng ajehng tv. § Jolen alokeltum ba Esowo!

¹⁷ Jo kaken nne awohng awohng! Nong, abo-nane ebahne go ejang bi Jisos jo kor-n. Jo fahlen Esowo! Jo kaken ntul!

Eljini erem bi Kraist bi nobo re wahr toono

¹⁸ Alokeltum, jo limen ajehng ajehng ji babnso ejahne l'jo tong-n, wahn fere jo kak bo go mbang

§ 2:10 2:10 Rom 9:25 * 2:11 2:11 Jems 4:1; Gal 5:17 † 2:12

2:12 Mat 5:16 ‡ 2:14 2:14 Rom 13:1-7 § 2:16 2:16 Gal 5:13

anyehng anyehng, afi bo nobo eljini, fere jol soom, afi bo kp'bibi.*

¹⁹ A wo li elfuulu ni Esowo, n l'kpuumu, eji bo kp-n kake erem mbol mbol, tibre n kp'kahne ntir atahng nyi Esowo.

²⁰ Nsehng anyi m bahke lehke, n l'kpuumu erem bi n limi ebi, bo dv-n no? N l'fere kpuumu erem, eji n kp'limi nob nob, owo m bahke bele eltuuru ni Esowo.†

²¹ Erem bia bi Esowo lung-n no kak. Tibre yefono Kraist tob nyehne erem go egahne esi, owo a tib-n mbang nyi m bahke jo toono,‡

²² ye jio ji ki lim abiafem anyehng anyehng. Efahng ajehng ajehng nnene wukem go ege a nnyo.§

²³ Eji bo jo su-e akuk, a joom ko nkuk faange bo. Eji a jo nyehn erem, a tikem nehke bo. A yehke ekunukpu eje kpee kunu Esowo bi kpo lam elam ji nno.

²⁴ Yefono Kraist wo solo abiafem enyahre go ege a ngubjing, tahm a nya go ekros, eji e l'tob kpo, yaame abiafem, fere jol go elkpín ni nno.* Go ege alok wo wahng m ma nob.

²⁵ Tibre wahn jolo ana ejoro bi ma tan mbang. Anv, wahn ebfeere ba goji mbaabebul no kpo kuuru atohko enyahne.

3

Akal ane, a alum ane

* **2:18 2:18** Ef 6:5-7; Tait 2:9-10 † **2:20 2:20** Mat 5:10 ‡ **2:21 2:21** Mat 16:24 § **2:22 2:22** Jon 8:46 * **2:24 2:24** Rom 6:11

¹ Mbang ny'nehm nyi, wahn akal ane, rí bahke jo woomo alum ebahne go elwo, eji n l'mal were bandiki ba kala taame tv alum Esowo ka Esowo.* Bahke jo jol go egahne eljini, afi rí bungem go nnyo.

² Bo bahke jo nyehn elkpin enahne ana li saang, fere jo nyehn ana n kpo kak bo.

³ Nliibi nyi n kpo liibi, kana jo liibi nliibi nyehka nyehka nyi nne kp'nyehne ana anebkal bandiki kpo liibi amahr amahr, fere jo tahng ebsi, fere jo kak nsol nyi bo limi go agul.†

⁴ Nobo re wahn bel ano nya li go atahng, nya l'k'tiki ranng. Belen eljini ni li soom, wahn fere jol fidemm, tibre a wo li ano nya kp'nobo go esamahr bi Esowo.

⁵ Ano nya a nya anebkal ba mahne mahne bele no, anebkal ba jo kak Esowo, fere jo yehke ekunukpu ebo kunu Esowo. Bo jo woomo alum ebo go elwo.

⁶ Ano wo Sera jolo no, jo wuk Ebrahim, fere jo lung-e re nfontahk. Wahn ba li abon ebe, n l'lim nob nob, k'jo fahl ejum ajehng ajehng.

⁷ Aneblum fvfo, jo kahnen ana rí bahke jo fili akal ebahne, fere jo kak bo, jol eji bo ki b'bik a nahne.‡ Tibre anebkal bahke tob bel ayare nya Esowo nya li elkpin a wahn a wahn fvfo. Jo limen ana, eji ero ebahne bi n kpo kak l'k'jo kpaake go mbang.

Erem bi nne Esowo bake nyehne tib go esi ji Esowo

* 3:1 3:1 Ef 5:22 † 3:3 3:3 1 Tim 2:9-10 ‡ 3:7 3:7 Ef 5:25

⁸ Es'kohro, nobo re wahn ane kpee, wahn jol go ntir ntir anyehng. Jo tiiren ane bako, wahn fere bel elgoro atemtem ana abonanyehn nne, ane bako jo fil-n ndon, wahn fere jo rede elnahne.

⁹ Kana jo ko ebi, feere ebi! Bo l'su-n akuk, kana jo ko akuk faange bo! Ga nob re wahn jo biri elfuulu ni Esowo tv bo. Tibre elfuulu ni, Esowo yehk-n no re wahn bel.§

¹⁰ Ana nwer Esowo bungu re,
 “Nne awohng awohng no l'seb re á bel elkpin,
 afung nya kp'bake l'fere ba kpir-e, nyao
 nya á bahke bele eyebatahng,
 nong, nne noo k'kpe jo bung ab'bi, fere jo kiimi
 afahnge,*

¹¹ á sennge njahm go abiafem alimi, fere jo lim
 nsol nyi kp'nobo.

Nong, á jo nok, jo seb elkoono.

¹² Tibre amahr nya Jehova kun goji atingitingi
 ane ebe. Á kpo wuungu atung go ero bi bo
 kpo kak.

Ane ba kpo lim ab'bi, Jehova kpo seenge bo abi
 amahr.”

¹³ Nne awo bahk-n ejum lim, eji n kp'noko re
 wahn lim ji kp'nobo?

¹⁴ Jol afi n kpo nyehn erem go nnoobo nyi n
 kp'limi, m bahke tiki bel elfuulu. Kana jo fahl bo,
 jol eko k'jo tan-n!

¹⁵ Nong, Kraist ko nji go egahna ntim. Jolen
 ane ba ma toobo ebjing, eji nne awohng awohng
 no l'jo bahb-n bade ekunukpu ji n kpi no, n l'jo

§ 3:9 3:9 1 Tes 5:15 * 3:10 3:10 Jems 1:26

lenge ka-e. N l'lim ano, jo bungen enange bem ana ane ba kp'kake Atem.

¹⁶ Nong, atahng emahne jol saang, eji ane ba l'jo su-n, fere jo bung ab'bi bada nnooba mbang nyi n kp'toono Kraist l'fere riki elbo ndon.

¹⁷ L'fere kor Esowo re nne nyehn erem, ga nob re á nyehn erem, eji á kpi nnoobo lim, sehng re á nyehn erem, eji á limi ebi.[†]

¹⁸ Tibre yefono Kraist tob nyehne erem nkpel anyehng, tib esi abiafem. Nnooba nne noo nyehne erem ka wahr abi ane, eji á l'ko-r song ka Esowo. Á kpoo go ngubjing, fere bel elkpin go etohko.

¹⁹ Eji á bele elkpin ni etohko, á kehm song kpiri atohko nya wob ngbekobo, fere bung alum Esowo tong bo.[‡]

²⁰ Atohko nyao jolo atohko nya ki taame tv Esowo, eji Esowo kpuumu no ngare nyi Noa jo kono egbang bio. Abon amohk ane anehkeni ba woomo egbang bio, bo ba foro no go alahb mao.

²¹ Alahb mao ma kp'tibi ewohngalahb ji kp-n tahre. Ewohngalahb jia lohngem alahb awuumu yehke ndahn ndahn go ngubjing, lohngo ntir atahng nyi nno nyi rí bahke jo gboongo Esowo re wahn bel, tib go elnyahme ni Jisos Kraist nyahme no,[§]

²² ye ji ma tahm go ejahbetul Esowo, song ji go eboblum Esowo, kp'fili babenjel, a atubesi ba li ona, a aj'jok ane.

[†] **3:17 3:17** 1 Pit 2:20; 3:14 [‡] **3:19 3:19** 1 Pit 4:6 [§] **3:21 3:21**
Elt 22:16

4

Eljini ni nne no ma yaange elkpin ene

¹ Ana Kraist nyehne erem go ege a ngubjing, ano wo nobo re wahn tob bel ntir ana nyi Kraist bele no, eji n l'bel eko. Tibre nne awohng awohng no l'nyehn erem go ngubjing, á kpo rahke abiafem alimi.

² Nong, á k'kpe lim ejum ajehng ajehng ji kpo melle ane go bo a ntim ngare nyi á kpeke li go njini, sehngem ji kpo kor Esowo, ji ji á bahke jo lim.

³ Tibre ekidi eblab sehng ji n jo lim nsol nyi kpo kor ane baka baka re bo jo lim. Wuku wuku n jo famme yanng, fere jo lim ajehng ajehng ji l'kor-n, fere jo wo b'buumu, jo li ebno, jo woomo go ellong anebe nw'woko, fere jo jom eblom bi sahb s'sab.*

⁴ Anv, ane baka baka ba ki nyi Esowo kpi bo esi kpo, eji n kil elkpe lim esabsab eljini ni bo kpo lim. Owo wahng bo kp-n suku.

⁵ Esowo bahke bahbe bo bade ejum ajehng ajehng ji bo limi no, ye ji ma toobo ebjing re á bahke lame anebe mbir mbir, fere lam ane ba ma kpo.†

⁶ Esi jio ji wahng, bo ma tob bung alum Esowo, tong ane ba ma kpo, eji bo l'bel elkpin ana ni Esowo go etohko, jol eji bo ma l'lam bo go ngubjing ana nne awohng awohng.‡

Ana nobo re nne kuuru ayare nya Esowo m-e ka

* **4:3 4:3** Ef 2:2; Tait 3:3 † **4:5 4:5** 2 Tim 4:1 ‡ **4:6 4:6** 1 Pit 3:19

⁷ Es'kohlo ji nsol kpee bahke kohlo ebkabbe.Š
Ano wo fvfo nobo re wahn k'lal, amahr enyahne
jol sange sange, eji n l'jo mal ero kak.

⁸ Ejum ji ga gbal kpee sehng ejum ajehng
ajehng li re wahn bel elkoro ni nno a nno
atemtem. Tibre elkoro ni kpo bulu abiafem atahl
nku a nku.*

⁹ Jo vvren ajenne, elmemme k'jol go atahng.†

¹⁰ Ana wahn, nne awohng awohng ma bel
ayare nyanye, nya Esowo m-e ka. Nobo re
wahn ko, jo lim nnoobo ka atemtem, ana ane ba
kp'male ajoobo ayare nya Esowo go elkuuru nob
nob.

¹¹ Nne awohng awohng no l'kehm bungu, nong,
á jo bung alum Esowo. Nne awohng awohng no
l'kehm loko, nong, á jo loko go eko ji Esowo kpo
ka, eji Esowo l'jo bel ellub go ejum ajehng ajehng,
ni kpo sehng go abo nya Jisos Kraist. Nong, ellub
jol ka-e, a nsahm go njinanjini. Emen.

Ana nne Esowo bahke jo nyehn erem

¹² Akpondahme, kiin kpe kpo esi go nfubu erem
bi n kp'nyehne, bi ba re ba wuung-n. Kana tir re,
erem bi n kp'nyehne, nkpokosi ejum nyi.

¹³ Ga nob re wahn jo geere, eji n kp'tob nyehn
erem bi Kraist nyehne no, tib eji n l'tob geere
ngare nyi bo bahke lennge ellub ene.‡

¹⁴ Elfuulu bahke jolo ka-n, bo l'su-n tib eji n
kp'toono Kraist. Tibre etohko ji Esowo ji kpi ellub
jia a nahne.

Š 4:7 4:7 1 Kor 10:11; 1 Jon 2:18 * 4:8 4:8 Jems 5:20 † 4:9 4:9
Hib 13:2 ‡ 4:13 4:13 Elt 5:41

¹⁵ Nong, nne awohng awohng ewahne k'nyehn erem bi ane awulu, tohko jol ano ejv avohko, tohko fere jol ano ab'bi alimi, a nnyo akake go nsol ane.

¹⁶ Nne l'nyehn erem tib eji á li nne a Kraist, nong, ndon ki-e jo fili, á jo ka na Esowo ellub go mbing nyio. §

¹⁷ Tibre ngare ebrehng nyi elam bahke bomo. Abon Esowo ba, bo bahke gboko mbang lam bo. Elam l'fere bom go egahre, es'kohro elam ji ane ba ki taame tv nnoobo etib bi Esowo bahke jolo renan?*

¹⁸ Ana nwer Esowo bungu re, "L'jol ejahkjahk re etingi nne Esowo bel eltahre, kehm gohro jol renan goji nne abiafem no ki nyi Esowo?"

¹⁹ Owo fvfo nobo re ane ba kp'nyehne erem ana koro Esowo re bo nyehn, bo soro na asi, jo lim nnoobo, fere rod atohko ebo, kak Esowo go ebo, bi limi nsol kpee, ye jio ji kpi ekakesehk.

5

Ejoro bi Esowo

¹ N kp'rehke anebkul ero ba wob go egahne ellong, eji me n tob li nnenkul ero,* n fere jol ntianse, n nyehne ana Kraist nyehne erem go egame amahr. M bahke tob jol go ellong ane ba bahke bele ellub ni Esowo bahke lennge.

² N kp-n rehke re wahn jo baabe ejoro bi Esowo kak-n go ebo. Kana jo lim ana bo bob-n na. Jo

§ 4:16 4:16 Fil 1:20 * 4:17 4:17 Luk 23:31; 1 Kor 11:31-32 * 5:1 5:1 2 Jon 1

limen go elkoro. Kana jo lim eltum nio ana eltum akpohko. Jo limen na a ntim a ntim enyahne.†

³ Kana jo seb re wahn jol atul ba ane bao ba bo kak-n go ebo.‡ Nobo re wahn jol ane ba ejoro bahke jo leeme eljini enahne,

⁴ eji ntubesi abaabebul l'lohng ba, m bahke bele ekpasi ntul ji ellub ene, ji l'k'tiki ranng.

⁵ Ano wo fvfo tob li ka wahn ji li ajangkun re, wahn woomo anebkul go elwo. Wahn ane kpee jo woomen atemtem go elwo.§ Jo reden elnahne, tibre nwer Esowo bungu re,

“Esowo kpehme ko ane ba kpo geere,

á kpo ka ane ba ma rede elbo nnoobo enye.”*

⁶ Jo reden elnahne go esamahr Esowo bi gbale sehng, eji á l'mehl-n wahre go ege a ngare.

⁷ Jo roden afemfem enyahne kpee, wahn song ka-e, tibre ye wo kp-n tiiri.†

Nnehm li ana egabe ji kp'biingi yanng

⁸ Kana jo lal! Nong, amahr enyahne jol sange sange.‡ Nnehm nnekv ewahne kp'jene yanng, jo biingi ana egabe ji kp'sebe nne no á bahk-e bobo li.

⁹ Yiimen t'tahne go mbang nyi Esowo,§ wahn fere ten nnehm, tibre n kp'kahne re, abon Esowo bako ba li go njini kpee, bo kp'tob nyehn erem ana wahn kp'nyehne.

¹⁰ Eji m ma nyehn erem mmongare ntiil, Esowo bi kpi nnoobo kpee, ye ji yehk-n no re wahn bel ellub ene, ni li go njinanjini, ni li goji Kraist, ye wo

† 5:2 5:2 Elt 20:28; 1 Tim 3:2-7 ‡ 5:3 5:3 2 Kor 1:24 § 5:5 5:5
 Ef 5:21 * 5:5 5:5 Jems 4:6,10 † 5:7 5:7 Fil 4:6 ‡ 5:8 5:8 1 Tes
 5:6 § 5:9 5:9 Ef 6:11-13

bahk-n limi, tete m mal mbang enye go eltoono. Á bahk-n kake atahne, fere ka-n eko, eji nnene l'ki-n nyeenge.

¹¹ Nong, nsahm jol ka ye go njinanjini. Emen.

¹² Me n nyon mmonkpehrekahba mmonwer noa ka Silvanus ji n kpo bum-e ana nkakesehk a mmonannee re, á ko ba ka-n. N kp'sebe re me n kak-n eltim fere tong-n re, nsol nyi m ma nyon a, nyi m ma taame tv, fere kp'limi, etingitingi nnoobo nyi Esowo nyi.

¹³ Aneb ero ba li go Bebilon, ba Esowo ma tob yehke bo kp-n kake nnyo. Mak mmon ewame re, me n tob kak-n nnyo fvfo.*

¹⁴ Jo kaken atemtem nnyo go nnyo asodo mio mi elkoro. Nong, elkoono jol a nahne, wahn kpee ji li ka Kraist.

* 5:13 5:13 Elt 12:12,25

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4